



# Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7 Yangia anidakangma : Tir Yimiyim

tiryimiyim@aolima

tir yimiyim

83

**Kamala Harris asoshi Democrats tasa tasen yanglutsü**

**Mohun Bagan Super Giant-i Jamie Maclaren alizükogo**



VOL. XXI ISSUE NO. 280 (ADOK 280) DIMAPUR SANGTENNÜ (TUESDAY) CHITENI (JULY) 23, 2024 ₹ 5.00

## Joe Biden-i US Tir election nung metokteptsü

New Delhi, July 22, 2024 (Agencies): U.S. President Joe Biden-i July 21, 2024 nü reelection campaign anenba aser US Tir election nung metokteptsü osang metetdaksüogo.

Joe Biden-i pa January 2025 tashi Tir inyaksü aser tan hopta tatemlen linük den jembitsü ta ashi.

Pai iba osang sangoktsüba sülen minute 30 shi dang lir Democratic nomination atema Vice-President Kamala Harris pusemba metetdaksü.

"Nenok President inyakba ya kü taküm nung tetushi tulutiba liasü aser ni tanaben inyaksü atema tokteptsü tebilemba liasü. Ozü party aser linük taginüba atema ni metokteptsü aser kü kümsük anünga aliba nung President ka teinyaksü nung dang temulung agütsütsü lemtet" ta Joe Biden-i ashi.

June 27, 2024 nü Donald Trump den presidential debate alidang Joe Biden-i kanga mejungi shilem agiba aser Democrat lennir aikati pa dang presidential election nung shilem magitsü ayongzükä aruba mapang ka nung Biden-i iba lemtet agiogo.

Joe Biden-i iba osang sangdongba sülen mezüng Vice President Kamala Harris den phone ajanga jembü. Iba sülen pai White House chief of staff Jeff Zients aser pa campaign chair Jen O'Malley Dillon na den senden balala amen.

Joe Biden-i taoba hopta tatemlen White House counselor Steve Ricchetti, senior campaign adviser Mike Donilon, deputy chief of staff Annie Tomasini aser senior adviser to the first lady Anthony Bernal nung den olemtepa aruba sülen tir election nung shilem magitsü lemtetogo.

## Online ajanga gari/phone samaba osang agütsütsü

Dimapur, July 22, 2024 (TYO): Nagaland Police gari auyaba aser phone samaba/auyaba ken o tem online ajanga benoktsü inyakim tasen ka tenzük.

Ibala tatalokba mapang shitak nung online ajanga ashiba ajanga mapang shitak nung mapa inyaktetsü ta Nagaland Police-iashi.

Auertemi yoktoktsü atema auyar aser public-i item auyaba osettsüset memeteti aliba aiben denja aruogo. Anungji public-i second hand items malidang tamasa jangjateptsü asoshi

tarutsü nung database ka yanglutsü ta parnok i ashi.

Tsünglanglen agüja aliba link nung nübertemi online ajanga gari aser phone auyaba ken o benoktsü akok, saka insurance atemabo Police Station nung physical complaints agütsütsü ta Nagaland Police-iashi metetdaksü.

1) Stolen Vehicle: <https://forms.gle/VmbN5FcT3tgJiKok7>  
2) Lost/Stolen Mobile Phone: <https://forms.gle/NsAXrcD16grovW468>

## Arambai Tengol-i Khristantem merenshiba anentsüla: NSCN

Dimapur, July 22, 2024 (TYO): Manipur nung Arambai Tengol-i Khristantem dak tenük yoka mapa inyakba magizük aser National Socialist Council of Nagalim (NSCN)-i Khristantem kümzükä ayutsü atema inyaksü ta metetdaksüogo.

May 3, 2023 nungi Manipur nung Meitei-Kuki-Zo rara adokba sülen NSCN-i tiyongtsü nung dang lia arur saka anogoshia osang metetpela arur ta MIP, NSCN/GPRN-i sangdong ka nung ashi.

Telungpur telok Arambai Tengol-i Khristantem nem timtem agütsüba aser züka merenshiba

onoki nguogo. Arambai Tengol tenzükertem nisung ajaki meteta lir aser item nisungtem yagi tali bilemloka oa inyaksangshia temelenshi bener arutsü meranger, ta MIP-i ashi.

Arambai Tengol-i tashiyim amshiba ya kanga majung anungji NSCN-i Manipur nung Khristantem kümzükä ayutsü atema noktaksü. NSCN-i Manipur nung tamangba yimsü telok ajak külemi putepa linür anungji Arambai Tengol-i Khristantem anema bilemba melendaksünür ta MIP-iashi metetdaksü.

## Mon nung ILP verification drive agi

Dimapur, July 22, 2024 (TYO): July 20, 2024 nü Mon jila aser temeket nung District Administration aser Police Administration Inner Line Permit (ILP) verification drive ka agiogo.

Echunbemo Erui SDO (C), Tshelhiu EAC HQ. aser T. Imlongchaba Chang EAC Sadar nung anir ozüng alema arurtem mita senzü.

Iba mapang nisung kar ILP anogo süir aliba aser karbo kulikaket tejangia maliba putet aser parnok ajak ozüng tapet agi merenshiba liasü.

Mon District nung ozüng alema arurtem aser kulikaket shitak malirtem jangjatsü atema mapang shia ILP verification drive agitsü ta ketdangsurtemi metetdaksü.

## Nagaland sorkar mapa inyakertem taa repringshitsüla



Kohima, July 22, 2024 (TYO): Nagaland State Human Rights Commission (NSHRC)-i Nagaland state sorkar dang scheduled employments asoshi minimum wages meyipa repringshitsü aser tutsütsü shiogo.

Minimum wages Act, 1948 kübok Centre aser state sorkartemi mapang shia scheduled employments nung inyakertem minimum wages repringshitsü lateta lir ta NSHRC chairperson Justice Songkhupchung Serto aser member Nzanbemo Lotha nati ashi.

Nagaland state sorkari 2019 nung employees/workers atema taa meyipa repringshitsü aser ibaji Unskilled - Rs. 176/- per day, Semi-skilled - Rs. 210/- per

day aser Skilled - Rs. 235/- per day ta sangdonga liasü.

Ajisüaka, iba sülen state sorkar kübok employees/workers indang taa khen danga merepringshi dang arur ta Commission-i ashi.

"Tesüiba küm pungu tsüngda kechisarena nung jenjang tuogo aser state sorkar kübok employees/workers taa anguba agi mepirir. State sorkari par employees/workers nem nungdakba ama sen magütsüra, ibaji taküm alitsü temeten anema inyakba mapa ka lir" ta NSHRC-iashi.

Assam, Mizoram, Meghalaya, Sikkim aser Arunachal Pradesh state sorkartemi parnok employees/workers indang wages repringshimogo aser Nagaland dang nungi teimba

agütsür ta parnokisa ashi.

"Centre sorkaria minimum wages kümzükä ayutsü atema Consumer Price Index Number for Industrial Workers den sendaktepa Variable Dearness Allowance (VDA) yanglutsüogo. Iba ya State aser Union Territory 26 nung benshir aser Northeast nunga Assam o Meghalaya nung benshidar. Jenjang atuba den employees/workers indang minimum wages menepteptsü atema VDA ya küm nung anaben meyipa repringshir" ta Commission-iashi.

Nagaland state sorkari taruba ita 2-3 tsüngda scheduled employment list nung adener employees/workers indang taa meyipa repringshimtsüla ta Commission-iashi metetdaksü.

Commission-iashi Chief Secretary, Finance Commissioner, Commissioner & Secretary of P&AR aser Labour & Employment department tem dang state sorkar iba lemtet agizükä inyaksü atema teinyaksü mapatem inyaksü tetuyuba agütsüogo.

Nagaland Chief Secretary-i ita ka tsüngda parnok inyaktetba osang lemsateptsü imlar ta NSHRC-iashi.

## Mobile Skill Morung ajanga yimdaklir tetsürtem taküm melenshitsü



Kohima, July 22, 2024 (TYO): Employment, Skill Development & Entrepreneurship (ESDE)-i tanü "Skill Development for rural women through Mobile Skill Morung" tenzükogo.

Kohima district kübok Village Council Hall, Sechü-Zubza nung Women Resource Development and Horticulture Minister Salhouuonuo Kruse-i iba sentong tenzüktsü.

"Iba training nung adenertemi sü artsü angazükba dang masü saka iba ajanga parnok taküm mesütsü. Pei atepzüng tashi nung arua training agütsüba ya kangasa tia taka" ta Minister Kruse-i ashi.

"Developing countries nung yimsüng tia nung alir tetsür 27% ajanga dang labor force nung shilem agir saka jilatem nung aliba tetsürtembo 56% lir ta International Labour Organization ajanga ashir" ta Secretary & Ex-

officio Director ESDE, Kovi Meyase-i ashi.

"Iba ongdang ya ulura anungji kasasa akümtsü nungdaker. Census 2011 ajanga Nagaland nung tetsür workforce participation rate (wpr) ji 44% liasü ta ashir aser iba ya national average 25.5% dang nungi teimba" ta Meyase-iashi.

Ajisüaka tetsürtemi shilem agiba ya aluyimba nung teimba lir. Nagaland nung yimdak alir tetsür 65.2% alu ayimer aser 7.3% alu mapa nung aayanger lir ta paisa ashi.

Nagaland nung tetsürtemi shilem tulu agiaka training magiba ajanga parnok tuluba aser tajanzük teimba ngua meinyakteter. Iba nungji ajemdaker iba Skill Development Program tenzük ta Meyase-i ashi.

Department-i iba sentong ajanga yimdak aliba tetsürtem

nem skill training maongkatem agütsünür. Mobile Skill Morung ya mobile skill training van ka lir aser iba ajanga mapa inyaksü. MSM ya tesem balala sema senzütsü aser temporary training centers lapoka tetsürtem nem training balala agütsütsü, ta pai metetdaksü.

Tanü Suruhuto, Zunheboto district nunga kasa training program ka tenzük aser idakji Mobile Skill Morung ka amenoka lir ta paisa shisem.

Tan shilem agiba sülen Mon kübok Phomching aser Wokha kübok Wozhuro nung Mobile Skill Morung ana ajanga tetsürtem nem training agütsütsü ta Meyase-iashi shisem.

Iba training program tanabuba shilem nung tetsür 100 nem Baking indang skill sayutsü aser training nung adenba tetsür shia nem basic startup toolkit ka agütsütsü, ta Meyase-iashi.



# DPDB Dimapur chairman inyaktsü H. Tovihoto shim



Deputy Commissioner, Dimapur indang Conference Hall nung July 22, 2024 nü Dimapur DPDB senden nung Advisor, H.Tovihoto Ayemi-i jembidang tangokba noksa nung angur.

**Dimapur, Chiteni/July 22 (TYO):** Ita shia amenba Dimapur District Planning & Development Board (DPDB) senden July 22, 2024 nü Deputy Commissioner, Dimapur indang Conference Hall nung DPDP Dimapur chairman tasenba aser Advisor, Tribal Affairs and Election, H. Tovihoto Ayemi lenisüba kübok mena liasü.

Iba senden tenzüka Deputy Commissioner aser DPDB Dimapur indang vice chairman Dr. Tinojongshi Chang-i DPDB Dimapur chairman tasenba pela agizük aser pa lenisüba kübok district tejakleni aotsü imlar ta ashi.

DC Dimapur ajangasa ULB elections mapang mapa tajungtiba nung inyakba asoshi külem tenzüker aser pa kübok alirtem nem tenüngsang agüja liasü.

Dimapur DPDB chairman tasenba Tovihoto-i züngsemtem pala agizük aser pa nem iba

maongka agütsüba atema Government of Nagaland dang pelaba shia liasü.

District aintsü aser ajangzüksü atema mapa inyakba aser shilem tajung agiba atema pai taoba Dimapur DPDB chairman aser züngsem ajanga dang pelaba lemsatepa liasü.

Meyi mapang Japanese encephalitis tashidak poktetba indang tebilemstü CMO Dimapur-i benokba atema pai süoki ia jembi aser Health department dang DMC aser lokti tentet balala den teka amteper fogging exercise agitsü ashi.

Paisa kasa department dang nüburtem nem awareness agütsütsü indanga shia liasü.

Dimapur ya nütsüng yongsük timtiba aliba district lir, aser yangi tayongzükba jenti lir, anungji ajaki asendenshir inyaktsüla, ta Advisor Tovihoto-i züngsemtem dang ayongzüka liasü.

Pai department ajanga dang pei nem nungloksüba mapa aser talisa Centrally Sponsored Scheme tem temulung agüja shidak inyaktsü shia liasü.

Iba senden nung Dimapur I, Dimapur II aser Dimapur III Assembly Constituency tem atema LADP 2024-25 agizüka liasü, Cornerstone College tenüng Connorstone College ta melentsü temelaba agüja liasü.

Nagaland Flatfenders Club, Kinunger Society, United Riders Motorcycle Club Nagaland, Nagaland Agarwood Farmers Association amala society registration atema benokba onüktem jembir nüngdakba mera agitsü lemteta liasü.

Taruba DPDB senden nung department inyakyim indang osang agütsütsü Social Welfare Department aser Urban Development Department nem nungloksü aser mendenpubai melepzüng o jembia senden tembang.

# Mangkolemba nung arok tebilemstü seminar ayongzük

**Dimapur, Chiteni/July 22 (TYO):** Mangkolemba Baptist Church Social Concern Committee ajanga District Administration den lungjemer Town Hall, Mangkolemba nung July 20, 2024 nü arok tebilemstü indang seminar ka ayongzüka liasü.

Nüburtem asoshi rongdak tebilemstü jangjateta itemji tajungtiba nung aziüktsü asoshi sensaksema shisa lemsateptsü

nükjidong nung iba sentong ya ayongzüka liasü.

Iba seminar nung shisalen sayur ya ABAM, Impur nung Finance & Property secretary Maong Jamir liasü.

Pai tanü-asüng loktiliba nung tebilemstü balala aser item tebilemstü aser tayongzükbatem aziüktsü asoshi lokti tentet balalai shilem agitsü indang onük benoka jembia liasü.

Talisa yi aser temesepba

mozü achi ajemba ajanga rongsenketzüng nung takoksa ajuruba kisüng masü saka kibong jenti teraksa tiai aiba indang rateta ashi.

Pai item tebilemstü aziüktsü atema lokti tentet balala lungjemer mera agitsü ajungshia liasü.

Iba seminar ya kija aser lokti tentet balala adenshia shisa lemsatepa lenmang bushitsü asoshi sapang tajung ka liasü.

# Dimapur nung ketdangsürtemi totzü ayokba tesemtem sema ao



**Dimapur, Chiteni/July 22 (TYO):** National Clean Air Programme (NCAP) kübok July 20, 2024 nü Dimapur nung totzü ayokba tesemtem sema jaja liasü. Iba telok ya District Administration-i anir Fire & Emergency, Police, Food & Civil Supply, Legal & Meterology, Chief Medical Officer aser Nagaland Pollution Control

Board nungi ketdangsürtem liasü aser parnoki Dimapur district kübok gari totzü ayokba tesemtem nung adulteration, fuel quality, quantity check aser mi lendong nungi kumzükba alitsü asoshi mera agia alibatem repringshima liasü.

Ibai National Clean Air Programme kübok sentong ka lir aser 2024 tashinung

particulate matters shilem 40 agi tajemba kumdaktsütsü aser mopung tajungba kumdaktsütsü nükjidong nung tenzüka alitsü.

Parnokisa gari totzü ayokba tesemtem nung tajemtsü tsü, angati gari tetsüng nung mopung inokba, tetsür aser teburtem atema metzü meshiba tesem balala ali mali mesüra CCTV inoka ali mali, itemjia repringa liasü.

# Kohima nung NCCDFI 2024 alitsü

**Dimapur, Chiteni/July 22 (TYO):** Kohima nung aliba Capital Convention Center nung July 25-26, 2024 anogotem National Conference on Cybercrime, Digital Forensics & Intelligence (NCCDFI) 2024 sentong alitsü, ta National Institute of Electronics & Information Technology (NIELIT), Kohima ajanga sangdong ka nung ashi.

Iba sentong ya Ministry of Electronics & Information Technology (MeitY), Government of India tawabangba kübok Nagaland Police aser Department of Information Technology & Communication, Government of Nagaland lungjemer ayongzük aser United Service Institution of India teyari nung alitsü.

Cyber security aser digital forensic nung tebilemstü balala alibatem tali tejangjaba nung angatetdaktsütsü aser lenmang balala sayutsü asoshi iba sentong ya ayongzük.

Iba sentong nung Ministry of Electronics & Information Technology (MeitY), Ministry of Home Affairs, Government of India, Indian Army, Indian Navy, Indian Air Force, Microsoft, The United Service Institution of India, Information Sharing and Analysis Center (ISAC), Deloitte India, PwC India, TCS, North Eastern Police Academy, Tripura State Forensics Science Laboratory, Central Forensic Science Laboratory Assam, Keystone

Education Group, Punjab Police, State Forensic Science Laboratory Himachal Pradesh, Adrey Consultancy, aser XIM University amala nungi lenirtem adentsü.

Iba sentong nung Cyber Security, Digital Crime, Cyber Law, Mobile Forensics, Financial Fraud Investigation, Digital Evidence, National Security, aser Emerging Technologies in Cyber Security & Forensics amala onüktem awajema jembitsü.

Iba sentong nung session balala lemsar sensaksema shisa lemsatepa national security tashi itshia cybercrimes aziüktsü.

Kasa mapang exhibition alitsü, kong digital forensic aser cybersecurity solution providers tajung temi parnok products aser solutions sayutsü.

Iba sentong nungya Cellebrite, Magnet Forensics, MSAB, MH Service, 4N6 Care Technologies, Tata Advanced Systems, D-town Robotics, Nextechno Gen Pvt. Ltd., Pi-labs, Power Forensics Digital Intelligence, aser Stellar Information Technology Pvt. Ltd. nungi shilem agitsü.

Iba sentong ya Director, NIELIT Kohima- MeitY, GoI, Er. L. Lanuwabang, aser Chief Innovation Officer, NIELIT - MeitY, GoI, Anubhav Tiwari na lenisüba nung agitsü.

Iba dak sendakba nung osang tali tejangjaba metettsü atema <https://nielitkohima.in/nccdfi> nunga angutsü.

# Agri. Department-i Tuli nung osettsüset lema agütsü



Agriculture Department ajanga Tuli area nung palm oil lu ayimer nem osettsüset lema agütsüba mapang tangokba noksa nung angur.

**Dimapur, Chiteni/July 22 (TYO):** Agriculture Department ajanga Tuli area nung palm oil lu ayimer nem July 19, 2024 nü Brush cutter, water pump, oil palm cutter, harvesting machine aser aluyimer nüngdakba oset aika lema agütsü.

Iba sentong nung Temjentoshi, SDAO, Tuli ajanga

aluyimer dang palm oil lu ayimba nungi tajangzük anguba agi asen takum kibong anisüngzükba alitsüba indang rasa ashi.

Aser taruba hopta nung iba palm oil ya market nung agatsütsü alinung aluyimer ajaki pei lu nungi adokba palm oil agizüka mapang shidak nung company dang ayoktsüla, ta pai ayongzük.

# Phek Town Council shisadokden senden amen

**Kohima, Chiteni/July 22 (TYO):** Phek Town Council pur shisadokden senden ka PTC chairman Shevohu Nienu lenisüba kübok Phek jila nung aliba lokti tentet balala den mena liasü.

Iba senden nung CSOs tem dang PTC yaritsü asoshi pei pei shilem agitsü ayongzüka liasü. CSOs ajanga jila nung tzü aser electricity tebilemstü nung temulung tali agütsütsü ajangshia liasü.

Iba senden nungsa ward balala aser jila nung circular road aser drainage system junga

anepalutsü nüngdaker ta jembia liasü.

Kasa senden nungsa jila nung shisaliok tajungtiba nung agütsütsü, sorkar indang office aser kaket reju tem semdangtsü, lanurtem dang libajen aser akhi tejen oset wazüka ayutsü ajangshitsü jembia liasü.

Parnokisa Phek Town Public Forum dang Sukrenyi benjongmung ayongzüktsü, jila nung training aser coaching centre lapoktsü, tetsür shishilembartem ajangkettsü asoshi lenmang balala nung yariteptsü indang jembia liasü.



# NEET-UG exam ken o nung mimshitsüsa kecha mali: Dharmendra Pradhan



July 22, 2024 nü New Delhi nung Indian Youth Congress (IYC) züngsemtemi NEET exam agishitsü takhangba agüja longkak aitdang tangokba noksa nung angur.

**New Delhi, Chiteni/July 22 (Agencies):** NEET-UG mangatettep ken o dak sendakba nung Centre sorkari mimshitsüsa kecha mali, ta Hombarnü Union education minister, Dharmendra Pradhan-i Parliament nung metetdaksü.

Paisa, tesüiba küm tenet tsüngda paper leak asüba kuli maliasü, ta ashi.

Parliament nung Congress MP, Manockam nem telangzüba agütsüdang Pradhan-i, "Sorkari mimshitsüsa kecha mali. Onoki Supreme Court nem osang ajak metetdaksüogo. Tang Supreme Court-i iba ken o angadangdar, anungji parnoki kechi obendang agütsüdir asenoki ata-a lidi. Iba House ya onük mashie lemteptsü asoshi lir," ta ashi.

"Tesüiba küm tenet tsüngda paper leak asüba kuli mali. Iba ken o ya Supreme Court matsügang lir aser osang ajak jungkai adokogo. Chief Justice of India-i ketdangsüa iba ken o

ya angadangdar," ta Union minister-isa metetdaksü. National Testing Agency (NTA) tentetba sülen parnoki exam 240 dak tema ketdangsüa agiogo aser kaketshir crore 4.5-i item tatidang agütsüogo, ta pai ashi.

Tesülen osangbenertemi pa dang, NEET exam ochimashi dak sendakba nung nai minister menden nungi anentsü asü?, ta asügangba langzüdang Pradhan-i, "Ni kü lenir Ato kilonser Narendra Modi-i melungba ama ni inyaker. Tashimait adokba mapang nung ozü sorkari telangzüba agütsütsü. Tim masüba inyakba balala dak sendakba ken o 4,700 nungi Patna nung ang ken o ka atema CBI aser police nati inyakdar," ta metetdaksü.

Hombarnep Parliament nung jembidang Lok Sabha nung opposition lenir, Rahul Gandhi-i, linük shisaliok inyakyim nung timtem tulu lir, ta jembia liasü.

NEET exam ochimashi dak sendakba nung sorkar aija Rahul Gandhi-i, "Tebilemstü onükji- linük nung kaketshir million aikati kechi ataloker ta tebilemstü akar aser India nunger examination agiba inyakyim ya ochimashi ta parnoki bilemer," ta jembia liasü.

Opposition INDIA teloktep nung densema aliba Samajwadi Party tongti, Akhilesh Yadav-ia, paper leak asüba tsütsü tang aliba sorkari 'record' ka yanglutsü, ta ashi.

Union Education Minister Pradhan aija Akhilesh Yadav-i, pa education minister inyakba mapang tashibo kaketshirtemi ochi temeden mangutsü, ta ashi.

Yadav-i, "Paper leak asüba tsütsü iba sorkari otsü tasen ka yanglutsü. Centre kar nungbo kaketshir 2,000 dak temai takok angu. Iba minister (Education Minister Dharmendra Pradhan) ali tashibo kaketshirtemi ochi temeden mangutsü," ta ashi.

# Sorkar ketdangsertem RSS nung adentsü melaba opposition-i aitsür

**New Delhi, July 22 (Agencies):** Tesüiba küm aika sorkar ketdangsertem Rashtriya Swayamsevak Sangh (RSS) nung madentsü aser shilem magitsü atema tenokdangba liasü, ajisüaka tawa Centre sorkari iba tenokdangba agienba sülen Congress leniba nung opposition-i iba telemtetba aija ola adoker.

BJP lenir, Amit Malviya-i sorkar sangdong ka metetdaksü, "Küm 58 tejaklen, 1966 küm linük temzüng alema sorkar mapa inyaker RSS nung shilem magidaksütsü atema tenokdangba liasü saka Modi sorkari ibaji agienadokogo. Mezüngyongi iba tetuyubaji malitsüla liasü," ta metetdaksü.

Osang angazükba agi, iba tenokdangba ya July 9, 2024 nü agien. Indira Gandhi Ato kilonser asüba mapang 1966 küm November ita nung iba tenokdangba ya benoka liasü.

Malviya-i iba osang X ajanga metetdaksüba sülen Congress lenir, Jairam Ramesh-i, iba tenokdangba ya BJP lenir, Atal Bihari Vajpayee Ato kilonser asüba mapang nunga liasü, ta ashi.

Jairam Ramesh-i X ajanga, "1948 küm February ita nung

Gandhi khasetba sülen Sardar Patel-i RSS nokdanga liasü. Iba sülen parnoki junga inyaksangshitsü ta ashiba agi iba tenokdangba agien. Iba sülenji- a RSS-i Nagpur (RSS headquarters alidak) nung kodanga linük wako masong. 1966 küm sorkar mapa inyaker RSS inyaksangshi nung shilem magitsü tenokdangba agütsü aser ibaji tim telemtetba ka liasü," ta metetdaksü.

All India Majlis-e-Ittehadul Muslimeen (AIMIM) tongti lenir, Asaduddin Owaisi-ia, "BJP sorkari sorkar mapa inyaker RSS inyaksangshi nung shilem agitsü melar. Iba ya khenyongi tim masü. RSS indang tenangzükba nung, parnoki 'pluralism' mamanger ta shia lir, parnoki Hindu nationalism atema jembir. NDA teloktep nung aliba party temia iba telemtetba ya agizüker asü?," ta asügang.

Trinamool Congress lenir, Derek O'Brien-i, "Sorkar mapa inyaker RSS inyaksangshi nung shilem agiba tenokdangba küm 60 tashi arudang tang Union sorkari iba tenokdangba agienba ya ajanga asenok süngmanger asü," ta ashi.



July 22, 2024 nü New Delhi nung tzüngluruwa mongpu Parliament senden tenzükba anogo nung TDP MP, Appalaidu Kalisetti cycle ka nung Parliament-i arudang tangokba noksa nung angur.

# Centre sorkari Bihar nem Special category status magütsür

**New Delhi, Chiteni/July 22 (Agencies):** Centre sorkari Bihar nem special status agütsütsü tebilemba mali, ta jangjaogo.

BJP-i aniba NDA teloktep nung densema aliba Janata Dal United (JDU)-i mapang talangka nungi Bihar atema special category status akhangar.

Hombarnü Lok Sabha senden nung Minister of State for Finance, Pankaj Chaudhary-i, "Bihar atema Special

Category Status magizük," ta metetdaksü.

Minister of State-i, "Tesüiba mapangtem nung National Development Council (NDC)-i state kar nem Special Category Status agüja liasü, kechiyong item states ji balaka züngshitsüsa kuli kar liasü. Item kuli rongnung (i) tenem aliba tesem, (ii) nütsüng ishika dang aser/mesüra tribal nütsüng ishika dang, (iii) kidanger linüktem den arrtsülen kanga

tongtibang tesemtem nung aliba tesem, (iv) rongsenkettzüng aser infrastructure terenlok tsütsü kanga backward aser state rongsenkettzüng mainba kulitem lir," ta metetdaksü.

Nitish Kumar-i aniba JD(U)-i akhangba tongti onüktem rongnung Bihar atema special status densema liasü. Taküm Lok Sabha election sülen Centre nung sorkar akümtsü atema JD(U)-ia BJP-i aniba NDA teloktep nungita liasü.

# Aluyimertemi August 1 aser 15 nü linük tesem ajaklen longkak aittsü

**New Delhi, July 22 (Agencies):** Aluyimertem organisation ana- Samyukt Kisan Morcha (Non-Political) aser Kisan Mazdoor Morcha (KMM) nati August 1 aser August 15 nü linük tesem ajaklen longkak aita minimum support price (MSP) atema takhangba agütsütsü.

Osangbenertem senden ka nung jembidang KMM lenir, Sarvan Singh Pandher-i aluyimertem 'Delhi Chalo' march tenzükba sülen August 31 nü anogo 200 ajungtsü, ta shia pai nüburtem dang Punjab aser Haryana arrtsülen Khanauri aser Shambhu points nung adenshitsü ayongzük.

Samyukt Kisan Morcha (Non-Political) aser KMM nati külem sangdong ka ajanga, August 1 nü linük tesem ajaklen aluyimertem district headquarters tashi jajatsü aser ruling BJP indang noksatem rongdoka longkak aittsü, ta

metetdaksü. August 15 nüa aluyimertemi district balala nung tractor rally agia alu nungi züsentebatem atema sorkar dang minimum support price (MSP) akhangtsü, ta parnokisa metetdaksü.

"Onoki legalised MSP guarantee takhangba agüja arur. Sorkari, ibaji ajanga rongsenkettzüng tsütsü khuret tulu ajurutsü ta ashir, ajisüaka onoki mongintem den iba indangji jembigo aser mongintemji ibaji ochi masü ta shiogo," ta parnokisa metetdaksü.

Osangbenertem den senden tembangba sülen MP 11-i aluyimer lenirtem ajurua liasü.

Aluyimer lenirtem ajururtem rongnung Shiromani Akali Dal nungi Harsimrat Kaur Badal, Congress nungi Amarinder Singh Raja Warring aser Sukhjinder Singh Randhawa na aser AAP nungi Malvinder Singh Kang nung densema liasü.



July 22, 2024 nü New Delhi nung Union Finance Minister, Nirmala Sitharaman leniba nung budget team-i Union Budget renemba sülen tangokba noksa nung angur.





## TIR YIMYIM YIMOBILEM (EDITORIAL)

DIMAPUR SANGTENNÜ, JULY (CHITENI) 23, 2024

### Raliwalirtem amongba yimtsüng

**A**lima nung linük shia pei pei inyakba tongti mapa kaka lir, anungji iba mapa jagi iba linükji nungtugu akümer aser iba mapa jagi iba linükji mesür. Kasaji, India nungsa süaka state shia pei pei tongti mapa kaka lir aser iba mapa jagi tangari iba stateji meteter. Aji oda, Jammu, Kashmir, Himachal Pradesh, Sikkim, Goa aser Meghalaya state-tem ya raliwalirtemi sapuba state-tem lir, Punjab, Bihar aser Assam nungi linük nung alir ajak peritsüsa chiyongtsü adoker, ano Assam ta süra jet ta süngo temulungjangi arur, kasaji Hyderabad, Bengaluru aser Chennai ama tesemtem ya Information Technology yimitem kümogo aser Maharashtra, Gujarat aser UP ama state-tem nung industry tululu amenoka lir, anungji nisungtem nungdak teimbaka item tesemtem nungji yanglur. Ano, tzüim tzüküm anasa alirtem West Bengal, Andhra Pradesh, Kerala aser Tamil Nadu state-temibo linük nung alirtem ajak asoshi ango chir mechima pua ayoker. Item state-tem denji kodang asen state tilaba ya medemdingdir, asenbo kecha masü, asenoka meinyaker masü inyaker saka asenoki inyakba agi asenok tebok masünger. Aji dang masü asenokia asenok ya kechi inyaka taküm aliar mejangjatetba purtem lir. Atangji, asenoki inyakba tongti mapaji government office-tem nung government mapa inyakba ya asütsü, anungji asenok ya government-i agütsüba ita sen agi taküm alirtem lir. Ajibo tangar dang ashila masü, kechiyong government ita sen dak metaloker aliba state-ji tangar kilirtem aliba state lir. Iba jenjang nung jagi asenok pilatsü merangtsüla aser asenoka asenok atema tenüng tajung ka yanglutsüsa asenoki akokba aser tangar nungdakba mapa kar reprangteta inyak tenzüksüla. Atangji, tenüngji asen janütsü ajatsü masü saka asen mapa dak alang tangari jatsütsü. Ibaji bilemdanga, asen lima nung asenoki inyakba nungi anguba rongsen agi asen nungdak perir külenang tangar nungdaka inyaktsütetsüsa asenoki inyaktsütsüba mapatem indang shisadangtsüla. Iba shisatsüji government office nungi marutsü mesüra yimten lenirtemia magütsütetsüsa akok, kechiyong alima takar kumdaktsütsüba aser asen taküm lia aotsüba shisatsü yabo Tsüngremi dang agütsür. Iba tangatetba nung Tsüngrem dang sarasadema asen lima yaa tangar lima amaji raliwalirtem amongdak lima ka danga kumdaktsü nunga koda (?) ta bilemer. Atangji, asenoki asen lima nung aonsutsü aser süngjanglijang lu meranga ayimer, shirururua meranga metsür, ano karibo ango tzübo tua ango metsür aser osettsüset tapu balala yanglur. Item ajakji asen mapa asütsü aser item jagi asenok taküm anisüngzüka lidaktsütsü. Ajisüaka, asenoki aluyimba aser kechisarina teka mapa inyakbatem agi tangar menepa asenoki meinyaktetsü, kechiyong asenok mapa inyaktsüsa nebo mali aser aluyimtsüsa lenden lima masü. Ajisüaka, asen lima nung tangar raliwalirtem arua jangratema amongtsüsa topur tajung tenem tekong aser ayong agi sünga lir aser tzü moponga onsara tajung, anungji asenoki asen yimtsüng nung asen kitem ya raliwalirtem anendak kuma yanglushir, pei pei yimtak alemli otsüla oboula nunger mapang nungi tetshia aruba tesem tongtibangtem merükteter wazüka ayutsüsa akok. Iba denji asenoki asen lima nung aliba ayongtem ajak merükteter, ayong anasa raliwalirtem anendak aser tsüraburtem ki mesüka yanglur, item tesemtemji asen sobaliba sayudak aser angazükdak tesem kuma yanglutetra, itemji alima tesem balala nungi arur raliwalirtem asoshi tongtibang tesem akümtsü. Tanü asüng raliwalirtemi town aser city nung masü saka yimtak yimtsüngtem nung dang anener, aji meteta asenoki asenok yimtsüng nung raliwalirtemi reprangnütsüsa tesem yanglua toktsüra aser raliwalirtem den otsü shia amongtsü aser parnok anir jajatsü (tourist guide) nisung aser tesem renemtsütetra, tanendak ki kibur, otsü ashir, chiyongtsü agütsür aser gari aser tetsüng agi anir senzür ajakji pei pei mapa dak alang sen aatsü. Asen anasa aliba lima, Sikkim nungbo küm shia parnok nütsüng yongsük dang nungibo teimba raliwalirtem par limai amongi arur, anungji parnok anendaktsüba, chijemdaktsüba aser anir jajaba sen nungi nübortema ajangzüker aser state-a takar akümer.

## OLEMSABANG

### TAZÜMERANG TANUR TEBU KA (Father of an average boy)

~ Temjentenzük Changkiri

Social media nung iba ocet ya English agi zülur züngshidang ni kanga temoatsü anguba agi, iba yabo ano asen oshi dang angatetba adianutem kar danga temoatsü angutsü mechi nung meyipzükdangogo. Iba ya tazümerang tanur tebu kati kanga dang temulung nung kongshitsüsa züluba ocet ka lir.

"Hau, nai shitak züngogo. Ni tazümerang tanur tebu ka lir. Tazümerang jagi ni oda shinübaji, kü tanurji angazükba nung tangar memenep, marks anguba nung tangar den tekübokba, asaya aser tanga angazükba mapatem nunga tangar memenep. Süra paji kechi nung junga lir? Asenok loktiliba aser school inyakyim agibo TAZÜNGLA.

Ner tanurji ongko aser tanga subjects-tem ajak nung tajung asütsü südi, nah, ta kü dang aiben asüngdangogo. Ni melangmelanga dang masüako, pa masüa ko ta ashir. Pa tazümerang tanur ka dang lir. Ni aaka bilemer asü? Masü. Ni pa masüba sürnung langka nung tajungtiba ta tangar matsüngdang tiyazü jembitsü asü? Adangji masü.

Kü jabasoji tazümerang tanurji lir, shiba tajungtiba nunga masü mesüra teküboktiba nunga masüba agi tangari majiteter. Nisungtemi pa temeimtsü menerem, tangar peladakja jembiyim, akanga azüetbatem, tejembinü jakla, aria bilemba wainshin, anükalem awaashi, tiyarinü yimyatem majiteter kechiyong pa tazümerang tanur ka dang lir.

School, loktilibai tanurtem shirnoki tematiba jenjang angur mesüra asaya aser tanga mapatem nung ajunger, parnok atema benjongteper, koba shitakba nung yamaji asütsüla.

Item ajak teyalong nungya, kü tazümerang tanur shiba terepranger ka aser par medemertem atema teka matena temulujang ajungai ajungshir ka dang shiba shingaia memeteter. Pai asaya meimba, parnok school team nung meshimtsü ta metetaka; pai kenten meimba, parnok school choir nung meshimtsü ta metetaka, kodanga ajema makümer. Pai itemji tokteptsü atema masü saka jangra atemtsü atema inyaker.

Pai tematiba marks mengutetba atema niji tesashi tebu ka masü asü? Hau, kü yari ka nia tesashi tebu ka aser tesüiba ampang nung aiben mit a adokogo. Kodang kü jabaso küm 7 tanuri yamai asüngdang, "oba, nai ni memeimer asü?" item o jagi kü dak tsüngteta atsüng.

Asenok shibaisa asenoki tanurtem meimtsüba aser parnok nem akhüm agütsütsüba indang shisadangdang? Asenok taintemibo asen nem mapang shia akhüm agütsütsübaji akhanger. Süra tanurbajibo koda?

Tanurtem shirnok ano küm nung kanga lanu, oda küm 10 tain mapang nungi IIT, MBBS atema renemteper, item rongnung, kü tazümerang tanurbo alima ajak lunga senzütsü, nisung tasen ajurutsü aser chiyungtsü tasen chidangtsüba indang jembir.

Kü tazümerang tanurji doctor, astronaut, scientist akümtsüa akok mesüra makümtsüa akok. Saka, ya tejangja, pa nisung tajung ka kuma intettsü, shibai tepela proktsü.

Otembang nung, tazümerang tanurji ajitetang/metetang. Tanur nem iba lima dak temulung lemtettsüsa tenangzükba ngutetdaktsütsü atema, tanur kati asenok taintem nungi aginüba ajak agi, paji pa asüba atema asen menürem aser aria bilemba aginer. Tanur shiaji balala lir, yongji anitetbayima balala lir".

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir**



## Khristan lenirtemi Rijiju ajuru; anti-conversion ozüng agientsü akhang



July 20, 2024 nü New Delhi nung Khristan lenirtem telok kati Minority Affairs Minister, Kiren Rijiju ajurudang tangokba noksa nung angur.

**New Delhi, Chiteni/July 22 (Agencies):** July 20, 2024 nü India nung Khristan lenirtem telok kati Centre sorkar dang tang state 11 nung benoka aliba anti-conversion ozüngtem agienang, ta takhangba agütsüogo.

United Christian Forum (UCF) nungi züngsem 8-i New Delhi nung Minority affairs minister, Kiren Rijiju pa indang office nung ajurua pa dang, "Anti-conversion ozüng ya minorities anema inyaksü atema hadir ka kümdaktsüogo," ta ashi.

Parnoki minister dang, anti conversion ozüng agientsü atema state sorkartem dangi shidi züludaktsüner, ta mepishia metetdaktsü.

Tang India kübok state 11 nung anti conversion ozüngtem benoka lir, aser item states ji teimbaka BJP-i yimsüsüba state tem lir.

United Christian Forum nungi lenirtemisa minister nem temepishiba shidi ka agütsü, aser iba shidi nungji Khristantem anema inyakba kanga bulua akümba osang tejangka metetdakja lir.

Kasa shidi nungjisa Khristantem reshikangshiba, tepsetba, tiyazü nung tai tongloksüba, loktiliba nungi sendokba aser Khristantem tasü mang meremdaktsüba osangtem metetdakja lir.

Tesülen osangbenertem den jembidang AC Michael-i, "Onok tebilemtsü onüktemji pai reprangshitsü minister-i melungogo," ta metetdaktsü.

July 22 nü osangbener den jembidang UCF nung tongti, A C Michael-i, "Onoki maneni Centre sorkar aser iba ozüng benoka aliba state tem den-a jembitsü," ta metetdaktsü.

2023 küm India nung Khristantem anema inyakba tatalokba 727 liasü aser taküm küm tenzüker June ita tembang tashi nung linük nung Khristantem anema inyakba tatalokba 361 lir, ta UCF-isa minister nem metetdaktsü.

Taküm India nung Khristantem anema inyakba tatalokba teimtiba aliba state anaji Chhattisgarh aser Uttar

Pradesh state na lir.

Chhattisgarh state nung Khristantem anema inyakba tatalokba 96 lir aser Uttar Pradesh nung Khristantem anema inyakba tatalokba 92 lir. State anaprongla nung BJP sorkar lir aser anti-conversion ozüng-a benoka lir.

Minsiter nem agütsüba shidi nungjisa, "Khristantem anema inyakba tongti kuliji, Khristantemi tangartem Khristan yimsü dangi meyipdaktsür, ta tiyazü nung tai tongloksüba lir," ta shia lir.

Khristantem anema inyaksü atema police-ia right-wing teloktem den amalitepa inyaker, ta parnokisa metetdaktsü.

Khristan lenirtem jagisa minister dang, linük temzüng nung senso ajak nem yimsü temeden agüja liaka Khristantembo pei yimsü amangba atema zükseter, ta metetdaktsü.

July 12 nüa Trichur nungi Archbishop aser Catholic Bishops' Conference of India Tir, Andrews Thazhath leniba nung Khristan lenir telok kati Ato kilonser, Narendra Modi ajurua linük nung Khristantem anema inyakba tebilemtsü lematea liasü.

Andrews Thazhath leniba nung Arogo lenirtem kari Ato kilonser Modi ajurua senden minute 45 shi amen aser pa nem temepishiba shidi-a ka agüja liasü. Shidi nungji India nung Khristantem anema inyakba kanga bulua akümba, Khristantemi tangartem Khristan yimsü dangi meyipdaktsür ta tiyazü nung tai tongloksüba aser anti-conversion ozüngtem tim mesüi amshia Khristantem anema inyakba indang metetdakja liasü.

Arogo lenirtemisa Modi dang linük nung minorities aser Khristantem amokmerenba nokdangtsü atema inyakdaktsüner, ta mepishia liasü.

Temepishiba shidi ajangasa sorkari scheme balala ajanga sensakertem nem teyari balala agütsüba ajakji Dalit Khristantem nem ang agüjang ta mepishi.

Ato kilonser Modi ajururtemji Thazhath den Bathery nungi Bishop Joseph Mar Thomas, Delhi nung Archbishop Anil Coutoi Bishops' conference nung tatong Tir aser Mathew Koyickal Bishops conference's deputy secretary general nung liasü.

India nung Khristantem amakba aser anti conversion ozüng na sendaktepa lir, ta shia Bangalore nung Archbishop Peter Machado den tangartemia Supreme Court nung ken o benoka lir.

## ANOGO ABEN TSÜNGREM DEN

### Khrista Temeimi Ajungshir

"Kechiyong Khrista temeimi onok ajungshir, kechiaser ajak atema ka asü, anungji ajak asü ta onoki shisatet. Shirnok taküm lir parnoki pei atema ano taküm melii saka shiba parnok atema asü aser tanaben shia aru, Pa atema parnok takum alitsüla, ya asoshi Pa ajak atema asü" (2 Kor. 5: 14,15).

Tanela Temeshi ain ajanga Khrista osangtajung nung shisadangba ajanga, nüburtem taküm melenshitaktsü. Lipok temenen ajanga asenok taküm meyipsatsur liasü, anungji iba takümji melenshitsü nüngdaka aküm. Saka nisungi pa sasa iba takümji melenshitsü mokoki liasü. Tanela Temeshi ajanga temulungjang nung temelenshi adokdaktsü koba dang temulung meyipba ta ajar; shitakba lenmang nung mezüngbuba lia aser ibaji pa taküm yimya küma lia aotsü tanelai mapa inyaker.

Tsüngrem taochi mapa agi, kija taküm ajak, shia aruba Khrista den tanaben lungjemdaktsü, Khrista jakla temulungjang nung inoktsü aser telung nungi meimtsü, tashi angatsü, tenzüksü aser Tsüngrem peladaktsütsü aser parnok asoshi aser pa asoshi inyaksü ajungshir.

Khrista osangtajung ajanga dang, shitakba telung takümji melenshidaktsütet.

## Archaeologist temi Bahrain linük nung Khristan kiojen ka ngutetogo



Bahrain nung Archaeologit temi ngutetba kiojen noksa nung angur.

**July 22, 2024:** Archaeologist temi Arabian Gulf nung akhidang asüba Khristan kiojen ka ngutetogo, aser ibaji ajanga Aso 7buba mapang Islam yimsü meprokdangyonga iba tesem nungji Khristantem liasü ta jangjar, ta osang ka ajanga metetdaktsü.

Archaeologist temi Bahrain nung Church of the East 'Nestorian Church' ngutetogo.

University of Exeter aser Bahrain Authority for Culture & Antiquities nungi research agirtemi iba kiojenji tongti putir ka meyong asüba alitsüa akok, aser iba kiojenji Aso 4buba nungi Aso 8buba tashi nung aliba asütsü, ta radiocarbon dating ajanga asadangtetogo, ta parnoki university indang website ajanga metetdaktsü.

Iba kiojenji Samahij kübok yimtsüng leper ka nung angu. Iba tesem nung alirtem jagi Islam yimsü agizükba mapang tashi parnok iba tesem nungji liasü.

University of Exeter nungi Professor Timothy Insoll-i, iba kiojen nungji joka ka, chiyungba takdang ka, mapa inyakba takdang ka aser nisung aliba quarter asem densema ajak senteper takdang 8 liasü, ta metetdaktsü.

"Iba ya Bahrain nung Nestorian Church aliba indang kuli tang mezüng ngutetba lir, aser iba kiojen ngutetba ajanga akhidang iba tesem nung nisungtemji koma liasü, mapa kechi inyak aser kechi külema liasüar meteter," ta paisa metetdaktsü.

Kangkai densema akhidang

Khristantem temaitsü Chi-Rho aser ango ka jara nungji yanglular liasü, aser ibaji ajanga kiojen nungji Khristantem aliba kuli sayur, ta pai metetdaktsü.

Archaeologist tem jagisa sü, ajem aser Sasanian yimli mapa aliba 'copper' senjang aika angu.

2019 küm nungi tenzüka parnoki iba tesem nungji ali tua bushisüngdang aser 2023 küm nung ang maparen tembanga liasü.

Research agirtemi maneni iba tesem nungji mapa inyaka bushisüngdangtsü sentong yanglular aser 2025 küm museum ka yanglua iba tesem nung ngutetba osettemji wazüka ayuba den küleli nüburtem dang sayatsü tebilemba lir.



### AO OSHI ANGAZÜKDAK: TANÜ ANGAZÜKTSÜBA OJANG



**Takhang**

(v) mapai maoba agi temerenshi taah agiba (fine for absence in work)

\* Lanurtemi mapai marurtem dang takhang sarua ao.

**Taki**

(n) au agi leptetba marok (bamboo cup)

\* Akhidangbo lokti süngo ajemtsü atema taki dang amshia aru.

### OLONG PAITEP # 6853

1		2		3		4		5
6		7						
				8				
9				10				
						11		
			12					13
	14							15
						16		
			17					
								18
19								

**TIPIEN**

- 2. Teburtemi tejak nung awaba - (8)
- 6. T \_\_\_ em - (3)
- 8. Tzük ayudak - (3)
- 9. Nüngdakba dang timba - (6)
- 11. Züina ao - (4)
- 12. Yangi tzü angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikati iba ya ki den külemi yanglusemer - (8)

**LANGTSÜNGLEN**

- 1. Temejangdak - (6)
- 3. Nisung ka mapa inyaksü nübo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüngda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

### OLONG PAITEP # 6852 TELANGZÜBA


**TIPIEN :**

- 1. Telok, 4. Aluru, 6. Ozüng,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

**LANGTSÜNGLEN :**

- 1. Tenükjang, 2. Luden, 3. Kiochtsü,
- 5. Lenti, 7. Tajangzük,
- 11. Teronem, 12. Sempa,
- 13. Jahaz.

### NAI-A YA METETTER MA



July 18, 2024 nü Nigeria nunger medical doctor aser artist Fola David-i Guinness World Record ka angutsü atema noksa yangluba angur. Lagos nung aliba Onikan stadium nung Fola David-i Nigeria sobaliba senmang sayua 1,050 square metres 'Unity in Diversity' artwork yanglu aser iba atema "world's largest painting by an individual" otsü angutsü meranger.

## AMPTA-i Imphal-Jiribam majungba atema ola adoker



**Imphal, July 22, 2024 (Agencies):** Manipur state sorkari NH-37 nung aeroplane ka anentetsü ta ashiba atema All Manipur Petroleum Transporters Association (AMPTA)-i Hombar nungi tenzüker anogo asemnü mapa meinyaksü metetdaksüogo. Imphal-Jiribam lenmang kanga majungba atema tejashi nung AMPTA-i iba lemtet agi. Imphal aser Jiribam tsüngda senzütsü atema anogo pezü agir aser AMPTA-i National

Highway and Infrastructure Development Corporation Limited (NHIDCL) dang NH-37 anepalutsü shiogo. NH-37 kanga mejungi aliba ajanga truck gari 480 tashi len tom nung anendaka lir. Iba ajanga traffic timtem ajurur aser ibaji azüoktsü atema Tamenglong district kübok Nungkao yimtsüng nunga truck gari tazüngtem anendena lir. Social media nung video ka nung petroleum tanker ka NH-37 nung lishitsüng nungi

madoktetba sayur. Manipur nung tensa mejungi akümba ajanga transporters-i Kuki nunger aliba tesemtem mesüitsü atema NH-2 (Imphal-Dimapur) toktsür NH-37 nung senzür. Ajisüaka gari lenmang kanga majungba ajanga parnoki timtem aika ajurur aser mapang laluba den garitem raksar. Imphal valley nunga LPG peria mangur kechiyong July 18 nü tashiyim agi sen meshiba atema distributors-i lungkak aiter.

## Taoba APSC chairman Rakesh Paul den nisung 32 aitsüogo

**Guwahati, July 22, 2024 (Agencies):** Gauhati High Court-i APSC Agriculture Development Officer (ADO) recruitment ken o nung APSC chairman Rakesh Paul den nisung 32 aitsüogo. 2013 küm advertise asüba ADO mapa nung tim mesüi nisung shimokba ajanga iba ken o adok. ADO recruitment ken o ya

APSC sen yong mapa ayokba ken o nung shilem ka lir. Iba maparen nung Rakesh Paul ya tongti süa tai tongloksür ka lir aser ADO recruitment maparen ya pa lenisüba kübok inyaka liasü. APSC ken o ya 2015-16 nung temai adok aser iba mapang sorkar mapa angutsü atema ketdangsürtem nem süpokrem sen agüja liasü. Küm aika bushisüngdang

asere okadak angadanga aruba sülen Hombarnü Gauhati High Court-i nisung 32 aitsü aser 10 metentsüogo. Iba ken o nung metentsürtemji Vikas Pincha, Kunal Das, Kaushik Kalita, Musharaf Hussian, Beauty Gogoi, Feroz Maran, Jyotiban Dutta, Seiz Ali Zohri, Dritiman Roy aser Mausomi Saikia nunger lir.

## Hmar nungeri lanur asem shia nem Rs 1 crore agütsütsü akhanger



**Guwahati, July 22, 2024 (Agencies):** Barak Valley nung Hmar nungeri Chief Minister Himanta Biswa Sarma dang temeten meshir. Hmar lanur asem-Lalbiekkung Hmar, Joshua Hmar aser Lallungawi Hmar police ket nung tepsetba atema parnoki temeten meshir. Tanü parnoki Lakhipur, Cachar nung Sub-Divisional Officer (SDO) ajanga Chief Minister dangi memorandum yok. Hmar lanur asem ya July 16, 2024 nü Kabuganj-Anjur Road

nung Assam Police-i apu. Iba sülen Cachar Superintendent of Police-i par asem July 17, 2024 nü Bhuban Hills nung telungpur den khatepdang khaset ta ashi. Hmar lanur asem ya helmets aser Kevlar jackets semer liasü ta Assam police-i ashir. Ajisüaka, Hmar nungeri CM Sarma dangi züluba memorandum nung police-i safety protocols meinyakba shia lir. Lanur asem ket nung prangpong bena maliasü aser

parnok apudang timi dang tashi anga ta parnokisa ashi. Hmar nungeri CM Sarma dang iba ken o bushisüngdangtsü atema external IGP-rank officer ka shimtsü takhangba agütsüogo. Parnokisa videos nung aliba ama aibelenertem aputsü aser lanur asem kibong shia nem Rs 1 crore teyari agütsütsü akhanger. Hmar nungerisa Mizoram nungi doctor tem ajanga post-mortems agitsü takhangba agütsüogo.



# Kamala Harris asoshi Democrats tasa tasen yanglutsü

Washington, Chiteni/July 22 (Agencies): US tir election nung tanaben metokteptsü ta US Tir Joe Biden-i Deobarnü sangdongba sülen November ita iba election nung shilem agitsü atema sentong yanglutsü Democrats tem kanga mazüngi kumogo.



Biden-i osang sangdonger ghonda ishika tsüngta Democrats lenir aikati Kamala Harris yaritsü sangdong, shiba tang US tatong tir aser mapang ka US tir candidate liasü, aser tir asoshi tokteptsü atema nübu takzüba nunga la tejangjaba akum aser donations agütsür tali akum.

Biden-ia Harris yaritsü ta sangdonga la ya pa indang tatong tir shimba ya pai telemtetba agiba rongnung tajungtiba liasü ta ashi. Pa nübuyimba finance account tenüng "Harris for President" ta melen.

Harris indang presidential campaign tenzüker mezüng ghonda pongu tsüngta sen terara agütsürtemi ActBlue nung sen million \$46.7 dak tema bendener liasü, ta Deobarnü iba sapang ajanga social media X nung ashi.

Harris-ia US tir asoshi tokteptsü ta shiogo. "Tiri ni yaritsü ta sangdongba ya tetushi ulura aser kü tebilembaji iba nomination ngua takok angutsüba lir," ta lai Deobarnü sangdong ka nung ashi.

"Tesüiba mapang ni linük tesem ajunga sema jajaogo, aser America nunger den iba election nung nübu tejangja shimtsü asoshi jembia aru. Aser kasaji ni inyaksü."

Harris ya Hombarnep White House nung National Collegiate Athletic Association championship teams tushiba sentong ka nung jembitsü liasü. La ya Biden melen oa shilem agir, shiba taoba hopta COVID-19 tashidak puteta taneptsü agiba mapang lir.

Ajisüaka Democrats lenir

Tang tashi Harris den tokteptsüpur mesüra danga candidate bhusemer nübu tejangja mali, anungji lai presidential nomination angutsü imlar. Michigan governor Gretchen Whitmer-ia la den metokteptsü ta osang kar ajanga ashir. California governor Gavin Newsom-ia Harris yaritsü ta Deobarnü sangdong. Tena ya tokteptsü südi ta mapang ka nüburtemi jembia liasü.

Ajisüaka Deobarnü tetokteper ka temai adok. West Virginia senator Joe Machin, shibai küm tetenzüklen Democrat nungi independent akum, pa tir asoshi tokteptsü atema Democratic party dangi meyiptsü bilemtar ta osangtem ajanga ashir.

Küm 56 tsüngta US tir election nung tanaben tokteptsü nübuyimba nungi anenba tir mezüngbubaji Biden ya alitsü. 1968 küm Lyndon Johnson-i nübuyimba sentong nungi anena liasü, anungji Chicago nungsa Democratic convention nung delegates tem raratepa liasü.

Yimten yimsüsür tejen ka ama Biden-i tasak süaka iba telemtetba agiba atema Democrats temi tenüng asangba mapang Republicans temi Harris anema jembi tenzüker aser lai anti-democratic mapa inyakba asoshi ken o benoktsü ta tai tonglokja liasü.

Republican temi Biden tashi dak tashi maitba ajiteta Harris dak tuluktsü aser Biden dang White House yutsütsü akhang aser pa nübuyimtsü metemsü süra tir meinyaktsüla ta ashir.

"Kamala Harris ya Biden ama asayamenü ka dang lir," ta Trump campaign ajanga sangdong ka nung ashi. "Asen linük asoshi Harris ya Joe Biden dang tamajungba asütsü. Mapang ajak nung Harris ya Crooked Joe atema Enabler in Chief liasü. Tenaprong kasa dang aser tena tsüngta tebandang mali," ta ashi.

Harris ya shimtetra tetsür mezüngbuba aser South Asia nungi jakzüker nisung mezüngbubai US tir mapa inyaker akumtsü.

Pennsylvania governor Josh Shapiro, North Carolina governor Roy Cooper aser Arizona Senator Mark Kelly nungeria Harris yaritsü sangdongogo.

# Uganda nung security force-i opposition HQ shibangtsü



Kampala, Chiteni/July 22 (Agencies): Uganda nung sorkar anema longkak aitba sentong ka metenzük tsüngda security forces temi opposition party tongtibang indang headquarters meketbangogo. Ochi mashi inyakyim benshiba aser meimchir temeden anema inyaksangshiba anema iba longkak aitba sentong

ayongzüka liasü. Police aser sepaitemi Hombarnep National Unity Platform (NUP) indang office-i aoba lenmangtem ajak shibangtsü, koba linük yimtiba Kampala anasa lir. Longkak aittsü amokmerenba ajanga tir Yoweri Museveni kanga meita adokdaksüogo aser iba ya bendanger kari

rongmesoba lir ta ashi. NUP lenir Robert Kyagulanyi-i ashiba agi, iba tenokdangba agütsüba ajanga nüburtem aitsü aser adoktsü makoker aser nisung kar tashiyim agi sotogo.

"Item tasümaitemi National Unity Platform Headquarters military barracks ka kümtsüogo," ta X nung zülutsü. Kyagulanyi shiba dang Bobi Wine ta ajar, paisa opposition lenirtem aika tashiyim agi puogo, ta ashi.

Arishi küm 42 tain Bobi Wine ya pop star ka aliba yimdenyimsüsür akümba lir aser küm ishika tsüngda pa ya Museveni den tokteperitem rongnung tongtiba ka kümogo. Arishi küm 79 tain tir

Office of the  
**Longmisa Senso Mungdang**  
P.O.Mokokchung-798601. B.P.O. Longmisa  
Mokokchung : Nagaland.

**TENÜNGSANG AGÜTSÜR**

Mrs. TEMSUPONGLA Khensa Wife of Imosanen Pongen. Longmisa. lai Senior Treasuries Officer jenjang Department of Treasuries & Accounts. Govtment of Nagaland. nung ajangzüktetba asoshi L.S.M ajanga konang tetushi agütsür.  
Tulusang Tsüngremi nü taküm, kibong, aser wadang ajak nung len ania moajangma.

Sd/-  
**Yashiramok Ao**  
President, LSM

Sd/-  
**Watitoshi**  
G. Secretary, LSM

# Bangladesh nung kaketshir-temi longkak aitba anena atar

Dhaka, Chiteni/July 22 (Agencies): Bangladesh nung longkak aiterem aniba kaketshir lokti tentet temi Hombarnep ghonda 48 atema longkak aitba anena atatsü asoshi telemtetba agiba sangdongogo. Parnoki ashiba agi, azü aika tokshiba sülenang temelenshi bener arutsübo parnoki maginer.

Sorkar mapa mekazüka toktsüba dak sendakba nung yimjung nung longkak ait tenzüker sülen mepetmesü tulu adoka nisung taküm aika samaogo, koba PM Sheikh Hasina tenure nung lendong tamajungtiba asütsü.

Linük ajunga nung curfew benokogo aser sepaitemi yimtem nüka lir. Kasa mapang nung Brehostibarnü nungi linük ajunga nung internet shibangtsüogo aser iba ajanga osangtem tanga tesemi yoktsü atema tetsükdaksü adokogo.

"Onoki longkak aitba sentong ghonda 48 atema anena atar," ta longkak aitba sentong ayongzüka lokti tentet tongtiba Students Against Discrimination lenir Nahid Islam-i AFP dang mozüki nungi ashi.

Pa dak nüburtemi azükba sülen pa mozükidang tang temang anepaludar. Pai ashiba agia pa dak azükertem ya undercover police tem liasü.

"Onoki sorkar dang iba mapang tsüngda curfew agintsü, internet lapoktsütsü aser longkak aitba kaketshirtem anema jenjang magitsü akhang," ta pai ashi.

Deobarnü Supreme Court-i sorkar mapa mekazüka aliba tajemba kümtsüogo, kong 1971 küm Pakistan nungi Bangladesh nüjiso atema raraba nung shilem agir chirnurtem nem menden mekazüka tokja aliba densema lir.

"Sorkar mapa mekazüka toktsüba yimya melenshitsü atema onoki iba longkak aitba sentong ya tenzüker," ta Islam-i ashi.

"Ajizüka nisung aika tepseta, kiojen aser taküm aika sama aser azü aika tokshiabo onoki temelenshi maginer," ta paisa shisem.

Longkak aitba mapang mangatetep adoka mepetmesü tenzüker sülen nisung 163 süogo, kong police ketdangtsürtema aika densema lir, ta police aser mozükitem nungi osang agütsüba AFP-i metetdaksü.

Hombarnep maneni azütokshi lendong atalokogo aser nisung pezü injang agi yirur Dhaka Medical College Hospital-i anir oa liasü, ta AFP osangbener kati ashi.

Sorkar ketdangtsürtemi iba mepetmesü adokdaksüba atema longkak aiterem aser opposition aija arudar.

Dhaka Metropolitan Police otongdar Faruk Hossain-i AFP dang ashiba agi, longkak ait tenzüker sülen linük yimtiba nung nisung 532 bo puogo, kong opposition Bangladesh National Party nungi lenirtema kar densema lir.

Museveni-i 1986 küm nungi Uganda yimsüsüa arudar. Ajisüaka Uganda nung aliba lanurtemi anir longkak ait tenzüker agi aser parnoki ochi mashi inyakyim aser meimchir temeden anema inyaksangshiba atema Mongolbarnü longkak aitba sentong ka ayongzüka agitsü sentong yanglur lir.

Police otongdar Kituuma Rusoke-i ashiba agi, security forces-i timtem lendong balala ataloktsü aliba nungi jenboa alitsü atema jelia jenjang agiogo. Paisa, iba longkak aitba sentong ya NUP-i ayongzüka lir ta ashi.

"Onoki iba ken o ya asadanga aruogo. Parnok inyakyim meshidakba onoki lazük aser jelia jenjang agiogo,"

ta pai ashi. Opposition lenirtem aser rights activists temi ashiba agi, Uganda nung sorkar rongsen mashiyimi amshiba kanga bulua kümogo. Parnok temaba jenjang nung aliba ketdangtsürtem ochi mashi inyakyim atema memerenshiba asoshi Museveni aitsüogo.

Iba taitsüba ya Museveni-i magizüki arudar. Pai ashiba agi, ozüng yanglurtem aser minister tem densema aibelena alirtem anema kuli tejangja ngutetra parnok ajak merenshia arudar.

Honibarnü tir-i Uganda nunger lanurtem shirnoki longkak aitba sentong ayongzüka lir parnok dang parnok mi den asayar asütsü ta tekümdangtsü metetdaksüogo.



## PR Sreejesh Paris Olympics sülen asaya nungi anentsü



**Chiteni/July 22, 2024 (Agencies):** India nunger nungtu Hockey goalkeeper PR Sreejesh-i, pa Paris Olympics nung asayaba sülen asaya nungi anentsü ta sangdonggogo. Iba osang sangdongba sülen India tebur hockey team kanga ajungmesuogo aser "Win it for Sreejesh" campaign tenzüka alima nung hockey fan tem dang team pusemtsü mepeshia metetdaksüogo.

Sreejesh-i India tenüng nungi asaya 328 nung asayaogo. Pai Olympics asem, Commonwealth Games asem aser World Cup asem nung asayaogo aser taküm Olympics pezübuba asayatsü lir.

2010 World Cup nung mezüng asayaba sülen

Sreejesh-i India team nungi asayaba mapang takok aika ngutetogo, kong 2014 Asian Games nung gold medal anguba, Jakarta-Palembang nung bronze medal anguba, 2018 küm Asian Champions Trophy akokba, 2019 FIH Men's Series Finals, Bhubaneswar nung gold medal anguba aser Birmingham 2022 Commonwealth Games nung silver medal anguba densema lir.

Tokyo 2020 Olympic Games nung India team-i bronze medal anguba mapanga arishi küm 36 tain goalie yagi kanga tongtibang shilem agia liasü. Paisa India team FIH Hockey Pro League 2021/22 nung tasembuba jenjang nung tembangba mapang teyari tulu agüja liasü.

Kasa mapang nung Sreejesh nem 2021 küm Major Dhyan Chand Khel Ratna Award agütsüogo aser pa ya India nungi World Games Athlete of the Year (2021) angurtem rongnung tanabuba asayar lir. Paisa, 2021 aser 2022 küm atonga FIH Goalkeeper of the Year award nguogo.

Taoba küm India team-i Asian Games nung gold medal ngua asayaba mapang pai kanga junga asayaogo. Iba asayamung akokba ajanga India team Paris Olympics atema qualify süa liasü.

"Ni Paris nung tatembangbuba asayatsü atema renemba mapang taoba mapangtem kanga nümadanga bilemteter aser tarutsü asoshi timla akar. Ozü kibong, teammate tem, coach tem, fan tem aser Hockey India-i kü dang temeim sayuba aser ni nongita yariba atema kanga pelar aser iba ya ni teti bilemtettsü. Kü dak tamang akaba atema kanga pelar," ta PR Sreejesh-i ashi.

Paisa, Olympics masaya tsüingda pa asaya nungi anentsü atema team den sensaksemba indang metetdaksü. "Külem asayartemi takok aser tamakok balala ajangshia aoba mapang ni nongita yariogo. Onoki Paris nung takokba tashi taungtiba asayatsü aser medal sentsü melenshir bener arutsü tejangraba lir," ta pai ashi.

## Mohun Bagan Super Giant-i Jamie Maclaren alizükogo



**Chiteni/July 22, 2024 (Agencies):** ISL Shield tesüsabuba koker aliba team Mohun Bagan Super Giants-i Australia nunger striker Jamie Maclaren den küm pezü atema tenangzüktepba yangluogo.

Arishi küm 30 tain asayar ya Australia indang first division A-league nung goal timtiba idaktsüba asayar lir. Pai goal 154 idaktsür lir.

"Iain Hume mapang nungi ni India nung football asaya aika repringogo, koba Australian sports channels tem nung sayua liasü. ISL nung world-class asayar kari asayaogo. Ni Mohun Bagan shimba kuli tongtibangtibaji parnok puti otsü aser takok marok angutsü atema nükjidong aliba ya lir,

koba kü nükjidong den kasa. Ni Australia nung takok aika nguogo aser ni takok tajung nguyonga oya aliba staff aser asayartem nem teyari agütsütsü yongya atar," ta Maclaren-i MBSG media team dang ashi.

Maclaren ya Australia nunger striker tem rongnung tajungtiba ka ta züngshir aser pa national team nungi asaya aruogo. Pa tatamsa 2026 FIFA WC Qualifiers nung linük tenüng nungi asayaogo. Pa 2022 FIFA WC Qualifier Round of 16 nung Argentina makokba team nunga densema liasü. Pa iba asaya nung substitute liasü.

"Ni taoba mapang Kolkata derby repringogo aser onok indang stadium nung fan 60,000 adenshia asaya repringba

anguba ya jangrademtsüka. Fans tem atema Derbies asaya ya kanga jangrademtsüka lir. Ni taoba mapanga takok tajung nguyonga arua aliba club ka nung shilem agi-i arutsü. Kü nükjidongji takok timba ngutsütsü atema asütsü," ta pai ashi.

Macalren densema Mohun Bagan squad nung Australia nunger asayar pezü lir aser iba ajanga team nung tangatettep tali adokdaksütsü. Macalren nem offer tajung ka agütsüogo, aser pa ya league nung sen timtiba aazükba asayar rongnung ka asütsü.

"Ni taoba mapang Dimitri Petratos aser Jason Cummings den asayaogo. Dimi ya ball yanglutsür tajung ka lir. Pai kü nem assist aika sütsütsü aser paia goal aika idaktsütsü ta ni meteta lir. Ni A-League nung Golden Boots pongu anguba aser goal timtiba idaktsüba asayar akümba ya hopta tepeyong meranga inyaba aser teammate tem asayaba yimya angatetba ajanga lir. Ni pela aser anema aliba mapang goal idaktsütsü. Takok angutsüba atema team bendanga agütsür aliba ngua ni iba team nung denogo," ta pai shisem.

## Paris Olympics atema Abu Metha delegate ama shimogo

**Dimapur, Chiteni/July 22 (TYO):** Athletics Federation of India (AFI) Associate Vice President, Abu Metha, Athletics Federation of India-i, taruba Paris Olympics Games 2024 atema delegate ama nominate süogo.

Iba asayamung ya France yimtiba Paris nung July 26 nungi August 11 tashi ayongzüka asayatsü renemer lir.

AFI Secretary Ravinder Chaudhry-i shiti ka ajanga ashiba agi, Metha expertise aser tajangshiba ajanga India nunger delegate tem takok anguba nung teyari tulu agütsütsü.

Iba dak sendakba nung Nagaland Chief Minister, Neiphiu Rio-ia Metha nem tenüngsang agütsüogo aser pa tajangshibatem ajanga India aser talisa Nagaland nung saisapong kanga ajangzüktsü,

ta ashi. Abu Metha, shiba Athletics Federation of India Associate Vice President lir pa ya North East Olympic Association Working President lir.

Kasa mapang nung pa Nairobi, Kenya nung World Under 22 Athletics Championships asayaba mapang Indian Team indang team leader liasü.

Pa lenisüba nung India-i South Asian Cross-Country Championships Kohima, Nagaland nung ayongzüka asayaogo.

Maneni pa ya Athletics Federation of India aser World Athletics kübok National Mountain Running Committee indang Convenor lir. Nagaland-i tawa pa lenisüba nung North East Olympic Games ayongzüka asayaogo, kong state tanabuba jenjang nung tembangba liasü.

## Olympics nung LeBron James Team USA wako abener asütsü



**Chiteni/July 22, 2024 (Agencies):** NBA nung points timtiba ngur aliba asayar LeBron James, Paris Olympics nung teburtem rongnungi Team USA indang wako amer asütsü, ta USOPC-i Hombarnü sangdong ka ajanga metetdaksü.

Hokolbarnü Seine ayong nung asayamung lapokba sentong agiba mapang wako amer asütsü atema Arishi küm 39 tain James ya külem asayartemi shima liasü. Tetsürtem rongnungi wako amer Mongolbarnü sangdongtsü.

"Alima sabang ka nung United States tenüng nungi asayatsü ya kanga tetushi tulu aser talisa alima ajanga longjemba mapang ka nung linük tenüng nungi asayatsü ya jangrademtsüka lir," ta Los Angeles Lakers power forward James-i ashiba USOPC sangdong ka ajanga metetdaksü.

"Akron nungi tanur ka nem iba khuret nongloksüba ya ni atema dang masü saka ozü

kibong atema, ozü jila nung aliba tanurtem, kü teammate tem, külem Olympians tem aser linük kübok tesem balala nungi tejangraba tulu alirtem ajak atema lir.

"Asaya dak nüburtem longjemdaksütsü tashi lir aser ni iba tongtibang mapang nung shilem agitsü atema maangka ngutetba atema pelar," ta James-i ashi.

Seine ayong nung asayamung lapokba sentong agitsü aliba ya tang mezüngbuba Summer Olympics ka main stadium nung masü saka kima agiba asütsü.

James-i 2008 aser 2012 küm Olympics nung gold medal ngur lir. Taküm Paris Olympics nung pa dang masü NBA nungi ano tanga asayartema linük wako abentsü atema shimogo.

Milwaukee Bucks nungi Giannis Antetokounmpo-a Greece team wako abener asütsü shimogo. Antetokounmpo-i NBA Most Valuable Player naroküm anaben agizükogo aser 2021 küm league dena kokogo.

## BILEMDANGANG

"Lepshia inyakba ajanga mongin akümer."